

- प्रधानमंत्री नरेन्द्र मोदी ऑपरेशन सिंदूर ने फौजी कार्रवाई सागे देश री जनता रा मूल्यां अर भावनावां रो दरसाव बतायो।
- प्रधानमंत्री रा तौर ऊं श्री मोदी रा कामकाज रा ग्यारह साल पूरा व्हया—देश मांय विकास री सियासत री नुवी इबारत लिखी।
- राज्य रा केई हलकां मांय तेज गर्मी रो दौर चालतो रेहवण रा आसार— जयपुर, उदयपुर अर भरतपुर संभाग मांय कठे—कठे तेज बायरो बाजण सागे बिरखा री संभावना।
- प्रदेश रा बुजुर्गा ने मज़बूत बणावण सारु कार्यशालावां राख्यी जावेला—सामाजिक न्याय अर अधिकारिता मंत्री बत्ता ऊं बत्ता बुजुर्गा ऊं फायदो लेवण री अरज कीनी।

000

प्रधानमंत्री नरेन्द्र मोदी कह्यो है के पाकिस्तान रो एकमात्र मकसद भारत रो नुकसाण करणो है, जदके भारत रो मकसद गरीबी ने जड़ ऊं खत्म करण अर माली व्यवस्था ने विकसित बणावणो है। श्री मोदी आज गुजरात रा दाहोद मांय राख्यी ज्यी जनसभा मांय बोल रह्या हा। प्रधानमंत्री कह्यो के भारत री फौज मज़बूत व्हेवण ऊं माली व्यवस्था ई ताकतवर बणेला। वे कह्यो के ऑपरेशन सिंदूर केवल फौजी कार्रवाई नीं ही बल्कि भारत री जनता रा मूल्यां अर भावनावां ने बतावे है। श्री मोदी कह्यो के भारत घरेलू मांग पूरी कर र दिसावर मांय ई सामान बेच रह्यो है।

श्री मोदी साल 11 साल पैली **2014** मांय आज ही री तारीख ने भारत रा प्रधानमंत्री ओहदा री शपथ लीनी ही। ओ देश रा सियासी इतिहास मांय खास मोड़ रह्यो, जो देश मांय गठबंधन री सियासत रा 30 साल रा युग ने खत्म कीनो। देश री जनता ऊं मिल्या ऐतिहासिक जनादेश पाछे श्री मोदी भारत रा 14वां प्रधानमंत्री रा तौर ऊं शपथ लीनी ही।

सब का साथ, सब का विकास, सब का विश्वास अर सब का प्रयास रा मंत्र सागे श्री मोदी देश मांय विकास आधारित सियासत री नुवी इबारत लिखी। लारला 11 साल मांय देश सगळा हलकां मांय खास बदलाव देख्या। भारत आज दुनिया री चौथी मोटी माली व्यवस्था बण ग्यो है। श्री मोदी री मज़बूत अगुवाई मांय भारत साल 2047 ताँई विकसित देश बणबा ओड़ी बढ़ रह्यो है।

000

चालू शिक्षा सत्र मांय देश मांय दूजा देशां रा 15 विश्वविद्यालय कैम्पस खोलेला। केन्द्रीय शिक्षा मंत्री धर्मेन्द्र प्रधान आज नई दिल्ली मांय ब्रिटेन रा लिवरपूल विश्वविद्यालय रा आशय पत्र सुपुर्दगी समारोह मांय आ जाणकारी दीनी। वे बतायो के सरकार दूजा देशां रा विश्वविद्यालयां ने इण री मंजूरी दे दीनी है। खबरनवीसां सागे बातचीत करता थकां श्री प्रधान कह्यो के लिवरपूल विश्वविद्यालय आवता साल ऊं भारत मांय काम करणो सरू कर देवेला। वे बतायो के ऑस्ट्रेलिया रा दो विश्वविद्यालय गुजरात मांय शिक्षा—सत्र सरू कीना है।

000

मुख्यमंत्री भजनलाल शर्मा आज दिल्ली मांय राजस्थान हाउस ने और बेहतर बणावण रा कामां रो जायज़ो लीनो। ई दौरान श्री शर्मा अहलकारां ने गुणवत्ता वाळो काम तैय करण सारु जरुरी दिशा—निर्देश दीना। राजस्थान हाउस मांय कैफेटेरिया, कॉन्फ्रेन्स हॉल, योग कक्ष, पुस्तकालय अर टेरेस गार्डन समेत केई सुबीता मुहैया कराया जा रह्या है।

000

8वीं कक्षा री बोर्ड परीक्षा रा नतीजा रो ऐलाण कर दियो ज्यो है। नतीजा रे मुजब 96 दशमलव 66 फीसदी विद्यार्थी पास व्हे ग्या। शिक्षा मंत्री मदन दिलावर पाली ज़िला रा रानी उपखंड रा डीओआईटी दफ्तर ऊं वीडियो कॉन्फ्रेंसिंग रे ज़रिए नतीजा रो ऐलाण कीनो। वे पास व्हेवण वाळा सगळा विद्यार्थियां ने बधाई दीनी। शिक्षा मंत्री इण ऊं पैली एक गैर—सरकारी स्कूल मांय राख्यी ज्या समर कैप मांय पूर्गया। वे बच्चां कानी ऊं बणायी ज्यी पेंटिंग्स अर दूजी सामग्री देखी। ईं पाछे वे उत्वण अर बोमदडा मांय सफाई व्यवस्था रो जायज़ो लीनो। शिक्षा मंत्री गांव वाळां सागे बातचीत कर र वां री समस्यावां सुणी।

000

प्रदेश रा घणखर हलकां मांय आवता दो दिन ज़ोरदार गर्मी रो दौर चालतो रेहवण री शंका है। मौसम विभाग रे मुजब दिन री बगत पारो 2 ऊं 3 डिग्री सेल्सियस री बधोतरी व्हे सके है, जद के राज्य रा आतूणी हलकां मांय अन्तर्राष्ट्रीय सरहद कने रा ज़िलां मांय ऊंचो—ऊंचो तापमान 44 ऊं 46 डिग्री सेल्सियस बीचे दर्ज व्हेवण री संभावना है। महकमा रे मुजब राज्य रा बाकी हलकां मांय अधिकतम तापमान 45 डिग्री सेल्सियस ऊं नीचे रहवण रा आसार है। मौसम महकमा ऊं मिली जाणकारी रे मुजब आवता चार—पांच दिन ताँई राज्य मांय कठे—कठे आंधी चालण अर गरज सागे हल्की बारिश व्हे सके है। उदयपुर, जयपुर अर भरतपुर संभाग मांय कठे—कठे बिरखा रा आसार है। ईं बीचे पुरवाई रा ज़ोर ऊं पारो उत्तर्यो है। म्हाणी डीग खबरनवीस बतायो के लारला दो दिन ऊं चाल रहया अंधड ऊं केर्इ ठोड़ां बिजली रा खम्भा पड़ ग्या अर रुंखडा उखड़ ग्या।

ईं बीचे आज झूंगरपुर मांय जोरदार बायरो बाजण सागे मेह बरस्यो। लारला 24 घंटां मांय फलौदी 45 दशमलव 4 डिग्री सेल्सियस सागे सब ऊं उन्नी ठोड़ रहयो। पाली, जालौर, बीकानेर, बाड़मेर, जैसलमेर, चित्तौड़गढ़ अर भीलवाडा मांय अधिकतम तापमान 40 डिग्री सेल्सियस ऊं ऊंचो दर्ज करी ज्यो।

000

पृथ्वी विज्ञान मंत्रालय देश मांय मौसम रो सटीक अंदाजो लगावण सारु आज हाई रिज़ॉल्यूशन वाळी भारत पूर्वानुमान प्रणाली सर्ल कीनी। इण ऊं पंचायत लेवल ताँई मौसम री सटीक जाणकारी मिल सकेला। पृथ्वी विज्ञान मंत्री डॉ. जितेंद्र सिंह ओ मॉडल देश ने सूंप्यो। ईं मौके वे कहयो के आ प्रणाली पांच महिला वैज्ञानिक विकसित कीनी है। डॉ. जितेंद्र सिंह कहयो के मौसम विभाग देश री माली व्यवस्था ने दुनिया री चौथी मोटी माली व्यवस्था बणावण मांय खास काम कीनो है। वे कहयो के लारला कुछ बरसां मांय मौसम विभाग सटीक भविष्यवाणी कर र 50 हजार करोड़ रुपया रो नुकसाण व्हेवण ऊं बचायो। पृथ्वी विज्ञान मंत्री कहयो के साल 2014 ताँई पृथ्वी विज्ञान मंत्रालय सारु महज़ चार—पांच हजार करोड़ रुप्या आंवटित कर्या जाता हा, जदके मौजूदा सरकार इण रो बजट बधा र 20 हजार करोड़ रुप्या कर दीनो है।

000

सीमा सुरक्षा बल राजस्थान फ्रंटियर रा महानिरीक्षक एम.एल. गर्ग ऑपरेशन सिंदूर मांय बी.एस.एफ. रा जवानां री तुरत कार्यवाही री सराहवणा कीनी है। वे आज जोधपुर मांय बी.एस.एफ. फ्रंटियर मुख्यालय मांय खबरनवीसां सागे बातचीत कर रहया हा। बी.एस.एफ. रा आईजी सीमा सुरक्षा बल री परिचालन क्षमता अर तालमेल रा बारा मांय जाणकारी दीनी। वे बतायो के प्रदेश रा सरहदी ज़िलां जैसलमेर, श्रीगंगानगर अर बीकानेर मांय पाकिस्तान री ओर ऊं लगातार ड्रोन आवण—जावण रो सिलसिलो चालतो रहयो, ज्यां ने बीएसएफ फौज सागे मिल र नाकाम कर दीना।

000

प्रदेश रा बुजुर्गा ने मज़बूत बणावण सारु सामाजिक न्याय अर अधिकारिता विभाग री ओर ऊं प्रदेश रा सगळा ज़िलां मांय कार्यशालावां राख्यी जा रही है। 28 मई ने जयपुर मांय राज्य स्तर री कार्यशाला राख्यी जावेला। कार्यशाला मांय खाण—पीण, योग अर मनोवैज्ञानिक राय समेत न्यारा—न्यारा सत्र राख्या जावेला। सामाजिक न्याय अर अधिकारिता मंत्री अविनाश गहलोत बुजुर्गा ने ईं कार्यशाला ऊं जुड़बा री अरज कीनी है।

000

जयपुर मांय रीको रा न्यारा—न्यारा औद्योगिक हलकां मांय कारोबारी अर रेहवासी प्लॉटां री ई—नीलामी करी जा रही है। ज़िला रा 12 औद्योगिक हलका मांय 11 रेहवासी अर 27 गैर कारोबारी प्लॉट उपलब्ध है। रीको रा वरिष्ठ उप महाप्रबंधक कै.के. कोठारी बतायो के आं हलकां मांय होटल, नर्सिंग होम अर

रेहवासी प्लॉट्स आरू 9 जून तांई अर्जियां दी जा सके हैं। वे बतायो के राइज़िंग राजस्थान रा तहत राज्य सरकार सागे करार करण वाढ़ा ई ई ई—नीलामी मांय शिरकत कर सके हैं।

000

प्रदेश मांय चिकित्सा विभाग री ओर ऊं फलां अर तरकारियां मांय मिलावट रे खिलाफ खास अभियान चलायो जा रहयो है। 24 मई ऊं चाल रहया ई अभियान रा तैत फलां अर तरकारियां ने पकावण सारू काम लिया जा रहया रसायनां री जांच करी जा रही है। ई सागे ई नमूना भेजा कर र नुकसानदायक रसायनां री जांच सारू प्रयोगशाला मांय भेजा जा रहया है। ओ अभियान 30 मई तांई चालेला।

000

आईपीएल क्रिकेट होड़ रा तैत आज पंजाब किंग्स रो मुकाबलो मुंबई इंडियंस सागे व्हेला। जयपुर रा सवाई मानसिंह स्टेडियम मांय ओ मैच अब ऊं थोड़ी देर पछे साढे सात बज्यां सरू व्हेला। दोन्यू टीमां पैली ई प्ले ऑफ दौर मांय पूग ग्यी है। दोन्यू टीमां री निज़र ओ मुकाबलो जीत र पहली दो ठोड़ माथे रह र पहला क्वालीफायर मांय जगह बणावण माथे है ताकि वां ने फाइनल मांय पूगण रा दो मौका मिल सके।

000

राज्यपाल हरिभाऊ बागड़े कहयो है के भणाई—लिखाई जिन्दगी बणावे है अर भणाई—लिखाई ने बत्ती ऊं बत्ती जनता तांई पूगावण रा काम मांय गैर—सरकारी हलका री खास भूमिका है। श्री बागड़े आज जयपुर रा एक गैर—सरकारी विश्वविद्यालय रा दीक्षांत समारोह मांय बोल रहया हा। वे कहयो के गैर—सरकारी संस्थानां ने गुणात्मक शिक्षा जनता तांई पूगा र देश री बरकत मांय हिस्सेदारी करणी चाहिजे।

000

